





**BOSTON
PUBLIC
LIBRARY**



SECONDE DECLARATION DE MONSIEVR LE

Prince de Condé, pour faire cognoistre les
auteurs des troubles qui sont aujour-
d'huy en ce Royaume, & le de-
voir en quoy il s'est mis &
se met encôres à pre-
sent pour les
pacifier.



SECONDE DECLARATION DE MONSIEVR LE

Prince de Condé, pour faire cognoistre les auteurs des troubles qui sont aujourd'huy en ce Royaume, & le deuoir en quoy il s'est mis & se met encores à present pour les pacifier.



O M B I E N que monsieur le Prince de Condé ait assez demonstté par plusieurs bons effects, non seulement le grád zele & deuotion qu'il a au seruice du Roy & de la Royne, & l'entiere obeissance qu'il porte à leurs Maiestez, mais aussi la singuliere affection qu'il a au bié & repos de ce Royaume, en ce mesmemét que puis n'agueres il a differé iusques à l'extremité & necessité de prendre les armes, pour s'opposer à la violence de ceux lesquels estans encores pleins de sang & de menaces, & ayans mandé & assemblé des gens de toutes parts, s'estoyent armez contre la defense de leurs Maiestez, & estoient entrez avec leurs forces à Paris, où lors ledict seigneur Prince estoit : encores qu'il eust esté lōg temps auparauant bien aduerti de leurs desseins & entreprihes. Et par apres, sans auoir aucun esgard ny au degré qu'il tient en ce Royaume ny à ce qu'il n'auoit pas pris les armes le premier, au simple mandement de la Royne est le premier sorti de Paris avec sa compagnie pour

s'en aller en sa maison en intention de renvoyer incontinent tous les siens , esperant que les dessusdicts feroient le semblable. Lesquels au contraire sont demourez quelques iours audict Paris, à se renforcer: & apres y auoir fait plusieurs actes de souueraineté, sont allez trouuer leurdictes Maiestez avec leurs armes & forces, desquelles ils les tiennent encores enuironnez, & reduits en captiuité de leurs personnes & volonte. Et neantmoins ledict seigneur Prince, n'ayant rien en plus grande recommandation que la tranquillité publique, s'est tousiours voulu soubmettre à telles & si raisonnables conditions de poser les armes (qu'il a esté contraint de prendre avec si iustes & necessaires occasions) que tous ceux mesmes que les dessusdicts ont fait despescher vers luy de la part du Roy & de la Royne, ont tousiours dict que ceux qui refuseroyent lesdictes conditions, se mettroient en leur tort: desquelles ledict seigneur Prince ne fait à present autre mention ni redite, par ce que elles sont portees par sa premiere declaration. Mais craignant que ses raisons & les responses que (depuis auoir offert lesdictes conditions) il a faites, sur ce qui luy a esté mandé & remonstré de la part de la Royne à l'appetit des dessusdicts, n'ayent pas esté fidelement rapportees à sa Maiesté, ou que ceux qui ont la force aupres d'elle, vsans de leurs artifices accoustumez (pour faire entendre que la raison est aussi pour eux) ne les luy ayent desguisees, afin de tousiours nourrir & entretenir ce trouble, preferans leurs passions par-

ticulieres à la conseruation & repos de cest estat : ledict seigneur Prince n'a voulu faillir de les faire rediger par escrit , pour estre au vray entendues de leursdictes Ma-iestez , publiees par toute la Chrestienté , & congneues de tous les Princes, Potentats, alliez, amis & confederez de ceste couronne, & de toutes les Cours des Parlemens de ce Royaume. Lesquelles ledict seigneur Prince requiert, & mesmes la Cour de Parlement de Paris, (à laquelle il a nagueres enuoyé sa premiere declaration de vouloir icelle faire enregistrer, ensemble ceste seconde:) afin qu'il puisse cy apres rendre plus certain & perpetuel tesmoignage de ses presentes actions à son Prince, quand il aura attainit l'aage de iuger du seruice ou de la faute qu'on luy aura faicte durant sa minorité. S'asseurant tant ledict seigneur Prince de l'integrité d'une si rare & notable compagnie, & tant reputée par tout le monde , qu'elle examinera & pesera toutes choses avec la balance de Iustice & avec toute raison & equité, sans incliner à aucune passion ny affection de particuliers.

EN premier lieu on ne peut ny doit imputer audict seigneur Prince, ny d'auoir commencé le trouble qui se voit auiourd'huy en ce Royaume ny d'estre cause de le continuer & entretenir: veu qu'il est certain qu'il n'a pas commencé de prendre les armes , & quand il les a prises apres ceux qui festoyent armez cōtre la volōté du Roy & de la Royne, il en a eu iuste occasion, luy appartenāt

de droict naturel de garder à son pouuoir le Roy, les subiects de sa Maiesté, & soy mesmes de violéce: veu aussi q̃ depuis il s'est tousiours soubmis de les poser soubz cōditions raisonnables, & ne tendans qu'à vne bonne & paisible seureté de part & d'autre, & à la liberté du Roy & de la Royne: qui peuuent par là assez euidemment connoistre que ceux la en sont la seule cause, qui reiectent lesdictes conditions, & lesquels n'ayās peu endurer que la Royne continuast de gouverner sans force & violence (en contenant vn chacun en paix, & regardant songneusement d'acquiter les debtes du Roy son fils) se sont armez, sont venus à la Cour, & entrez au logis du Roy avec leurs forces, contre sa deffence, pour disposer de ce Royaume à leur plaisir: ont faict des carnages des subiects de sa Maiesté qui viuoyent soubz la permission de ses Edits: & par consequent ont mist toute la France en trouble, lors qu'elle cōmençoit à iouir d'un bon repos, mesmes pour le regard de la Religion Chrestienne, chacune des deux parties estimāt auoir dequoy se cōtenter.

Et (sans s'arrester seulement à ce qu'on voit à present) si on veut entrer vn peu plus auant, & mettre en consideration l'humeur & les deportemens passez d'un chacun, & regarder de plus loing qui sont ceux qui ont cy deuant suscitē & entretenu les troubles en ce royaume, on trouuera que ceux qui ont nagueres cōmencé de prendre les armes, & esmeu ceste guerre ciuile ont presque des leurs naissance coniuré de troubler la tranquillité de

cedict royaume & le repos, dont ils sont ennemis, parce qu'il est contraire à leurs desseins, & coupe le chemin à leur ambition, qui ne leur semble iamais estre assez ouuert n'y bien préparé, sinon quād il y a des occasions de remuement & entreprises nouuelles. Et sans sur ce propos faire mention du iugement que fit d'eux vn si grand Roy & de tel entendement comme François premier estoit, n'y de plusieurs estranges particularitez de leurs actions. Chacun scait que ceux la mesmes, ne pouuans endurer le bien d'vn repos public, furent cause de rompre la trefue si honorable & auantageuse, qui auoit esté faicte entre le feu Roy Henry & l'Empereur Charles & le Roy Catholic (dequoy non seulement nous ressentös encores, mais toute la posterité se ressentira) mettans par ce moyen toute l'Europe en trouble & cōfusion, & toute la France en ruine, pour paruenir à leurs fins & intentions assez cognuës: Et que depuis qu'ils eurent embrassé le maniement des affaires & finances apres la iournee de saint Laurens, & plusieurs desastres sur desastres aduenus à cause de ladicte rupture, ils commencerent incontinent à mettre les troubles en cediect Royaume, de sorte que le feu Roy Henry, ne pouuant plus supporter au pres de luy de si violens esprits, auoit deliberé de les enuoyer en leur maison, si la mort ne l'eust preuenü. Par apres, durant le regne du Roy François second ayans ces gouuerneurs estrangers vsurpé contre tout droit, & mesmes contre les loix & coustumes de France, l'entier gouuernement, ce pauvre Royaume n'a-il

pas tousiours esté en trouble & en armes? N'ont-ils pas à la veuë d'un chacun essayé d'acharner ce ieune Roy sur ses propres subiects, qui estoit autremēt bon & vertueux, & duquel ils ont fait ce qu'ils ont peu, pour souiller la memoire & chronicque par leurs cruautez? Ne l'ont-ils pas fait armer & tenir camp au milieu de son Royaume, cōtre les siens, avec vne telle & si espouuanteable face de misere & tristesse par tout cedit Royaume, que chacun a horreur d'en parler & le ramēteuoir? Et (pour acheuer leur tragedie) n'a lon pas veu par la mort dudit Roy François leur violent gouuernement estāt cessé, la Royne & Roy de Nauarre ayans vne bonne vnion & correspondance ensemble, auoir gouuerné tout cest estat enuiron treize mois paisiblement avec toute douceur & iustice: iusques à ce que leur ambition (qui ne leur permettra iamais de se contenir & viure en repos) les a resueillez & poussez eux & leurs bons agens & ministres, à troubler ciel & terre (cōme chacun voit) au tresgrand regret dudit seigneur Prince: qui ne doute point que toutes personnes de bon & sain iugement ne cognoissent bien ceux qui sont cause d'auoir commencé, entretenu & cōtinué de troubler ce Royaume. Dont on ne peut sans calomnie charger ceux qui ont tousiours demonstré par effect, n'auoir iamais suiuy ne recherché tels moyens, & aussi peu les honneurs & richesses, qu'au contraire ils ont pourchassé par les belles voyes que lon a veu.

SECONDEMENT, tant s'en faut qu'on doive
trouuer estrange si ledict seigneur Prince regarde à be-
songner seurement en ce faict avec tous ceux qui tien-
nent aujourd'huy le Roy & la Royne en leur puissance
que plustost lon luy deuroit imputer à grande faute s'il
en vsoit autrement, & qu'il s'oubliaist tant que de se met-
tre à leur mercy: veu la trop estrange façon dont il a esté
traité par eux par le passé, quand ils ont pris l'autorité
de commander en ce Royaume: aussi qu'il est certain
que leur dessein ne tend à autre fin qu'à l'entiere ruine
de la plus grand' part de la noblesse, & de tous ceux des
autres estats qui font profession de la Religion refor-
mee, & principalement dudit seigneur Prince & de
toute sa compagnie. Ce qui se peut euidemment tes-
moigner par la bouche mesme des sieurs de Guyse &
Conestable, & par les propos qu'ils ont tenus en pleine
Cour de parlement à Paris, vñs de ces termes. Qu'il
faut commencer par Paris, & que par apres on reiglera
bien le reste, & fera-on en sorte que lon cognoistra de
quelle Religion est vn chacun, & principalement ceux
qui ont charge: & que la principale intention du Roy
est de departir la compagnie qui est à Orleans, & que
puis apres il n'aura point les mains liees. Or puis qu'il a
esté en la puissance d'aucuns, par leurs affections par-
ticulieres, de rompre vn Edict si solennellement fait
comme est celuy du mois de Ianuier dernier, avec le-
quel tout ce Royaume s'en alloit en repos: & qu'en ou-
tre, ce qui auoit esté resolu l'onzieme iour de ce mois
en plein

en plein conseil (qui estoit de faire publier l'Edict des-
susdict sans l'exception & restriction de Paris & de la
banlieue) le iour ensuiuant, par leurs practiques & par
l'autorité qu'ils entreprennent, a esté rompu & violé,
& ladicte restriction passée par apres en la Cour de Par-
lement: on cognoist par cela clairemēt comme la Roy-
ne est obeye, cōbien elle a de puissance, & que leurs vo-
lontez, passions & affections particulieres sont par des-
sus sa volonté & la determination du conseil. Et est pa-
reillement aisé à iuger par leursdicts propos, & par tou-
tes leurs actions, qu'aussi tost qu'ils pourront, ils vou-
dront faire obseruer par tout ce Royaume ce qu'ils font
pour le regard de Paris & de la bālieue: & que par con-
séquent, il n'y a point de fiance ny asseurāce aux lettres
de leur Edict qu'ils ont n'aguères fait publier, tesmoin
le cry qui depuis a esté fait par les carrefours de la ville
de Paris, le vingtiesme de cedit mois, afin de cōuoquer
tous les gentils-hommes de ce Royaume, pour comba-
tre & punir les seditieux & nouueaux Chrestiens. Et n'y
a point d'apparence d'alleguer que le peuple dudit Pa-
ris ne pourroit iamais endurer l'Edict du mois de Ian-
uier, ne s'y soubmettre. Car lon a veu que par l'espace
d'environ trois mois mōsieur le Prince de la Rochesur-
ion, & depuis mōsieur le Marechal de Mommorency,
auec dix ou douze harquebuziers, ont tellement conte-
nu ledict peuple, qu'il n'estoit nouuelles de se quereller
les vns les autres. Ce qui a duré paisiblement iusques à
la venue dudit sieur de Guyse à Paris. Surquoy il est

bien à noter qu'ayāt esté sur la fin ledict sieur mareschal renforcé de quelques gens de pied & de cheual, pour empescher des monopoles qu'on voyoit se dresser de iour à autre, pour esmouuoir le peuple, il fut remonstré par le preuost des marchans & par ceux de la ville, qu'il n'estoit besoin d'y tenir vne telle force, qui ne seruiroit que d'incommoder le peuple:& qu'il estoit aisé sans cela de le faire viure paisiblement. Et neantmoins, apres la venue dudit sieur de Guyse, ledict peuple a si tost changé d'humeur, & a esté si malaisé de le cōtenir (ainsi qu'ils veulent faire croire) qu'il a esté besoin de leuer le nombre d'enseignes de gens de pied que chacun a veu, premier qu'en parler à la Royne, & cōtre sa volonté. Au reste, ledict seigneur Prince cognoist bien que c'est vne œuvre de Dieu, que lesdicts sieurs de Guyse & Conestable n'ayent peu dissimuler leur dessein publiquement & en si grande compagnie, & qu'ils ont dit dauantage qu'ils ne pensoient. Chose qui est pour confirmer ce que leurs plus familiers & domestiques seruiteurs disent ordinairement, & ce qu'on voit par infinies lettres qui ont esté surprises, qu'on ne demande qu'à dissoudre la compagnie qui est à Orleās, pour puis apres faire l'exécution (tant sur les grands que sur les petis) que de long temps ils ont proiectee. Dequoy font assez de foy les saccagemēs & cruautez qui n'aguères ont esté commises à Paris, tant en la presence dudit Conestable, que sous son autorité priuee: & qui tous les iours se commettent en diuers lieux contre ceux de la Religion re-

formee : & mesmement l'horrible & detestable massacre faict à Sens , Archeuesché appartenant au Cardinal de Guyse : qui ne fust aduenü sans leur nouuelle entreprise , & l'exemple & adueu qu'ils en ont donné. Dequoy & de toutes autres desolations & calamitez qui menacent la France, la faute n'en doit estre attribuee qu'a eux seuls.

Et quant à ce que la Royne mande audict seigneur Prince de se desarmer sous sa fiance & parolle , & s'en venir à la Cour , où il sera bien receu , & qu'elle luy fera bailler toutes telles seuretez par escript qu'il voudra : ledict seigneur Prince n'a autre desir que d'obeir à la volonté de ladicte Dame , & voir chacun viure en repos. Mais il entend bien que ces despesches la & toutes choses se font aujourdhuy à l'appetit des dessusdicts. Et ne voit point au reste que sa maiesté, quelque bonne volonté qu'elle en ait, luy puisse bailler aucune seureté, pendant qu'elle sera en la puissance des dessusdicts, & qu'ils seront autour du Roy & d'elle. Car quel moyen a elle de leur resister, ny à tout ce qu'ils voudront entreprendre, estant enuironnée de leurs armes & forces, qu'ils ont eux mesmes leuees & assemblees , & qu'ils ont bien osé amener iusques en la maison & chambre du Roy , contre sa volonté & defense expresse ? Aussi peu de seureté y a il de dire que le Roy de Nauarre (lequel ledict seigneur Prince & tous ceux de sa compaignie recognoissent apres le Roy & la Royné) tiendra seul la force, com-

B.ij.

me lieutenant general du Roy: attendu mesmement la façon dont ils entreprennent de le posseder & abuser de sa bonté. Ioinct qu'il n'y a point de doute que leurs gens & les forces qu'ils ont assemblees, ne soyent à leur deuotion (en quelque autre main qu'elles puissent estre) & qu'elles n'obeissent à leurs volonteze & intentions, & qu'ils ne s'en puissent ayder contre le vouloir de la Royne & du Roy de Nauarre, & contre eux mesmes, quand ils voudront. Comme ils ont assez fait congnoistre par le passé, ce qu'ils scauēt faire à la dicte Dame, & mesmes audict seigneur Roy, quand ils ont eu la force, le commandement & le moyen de nuire entre leurs mains, desquelles (s'il leur plaist s'en laisser souuenir) ils trouueront que la seule bonté de Dieu les a preseruez. Bref, le dict seigneur Prince ne peut voir avec raison autre seurreté que leur retraicte de la Cour, & la premiere & pleine liberté de la Royne. Et s'asseure bien que toutes les fois qu'il restera en ceste saison (& mesmes en temps d'une si vniuerselle paix) autres forces en ce Royaume que la garde ordinaire du Roy, & celles des places de frontieres, qui est accoustumee: ce ne pourra estre (veu leurs deportemens & conseils assez descouuerts) que pour faire quelque execution par force & violence. Et ne doute point, puis qu'ils ont bien osé assembler lesdictes forces de telle façon, qu'ils ne craindront non plus de les employer pour mettre afin ce qu'ils ont resolu. Qui fait que ceux qui ont à se garder de telles surprises, ne croyēt pas aisement aux parolles, si ce n'est d'autant que les

effets s'en ensuyuent : qui sont euidentement contraires. Car il appert que les dessusdicts font toutes les demonstrations d'animosité & d'ostilité dont ils se peuuent aduifer contre ledict seigneur Prince, & contre ceux de sa compagnie: lesquels ils publient par tout le mode pour rebelles & ennemis du Roy, ils font pouruoir à leurs estats, ils ne les menacent de moins que de la vie, ils font semer plusieurs faux bruits & calomnies cōtre les actiōs dudit seigneur Prince, ils font d'auantage faire leuees de gens de pied, dedans & dehors le Royaume: contre ce qui a esté respondu & accordé aux estats. Ils font pratiques avec les Ambassadeurs & avec les estrangers, partie soubs le nom & autorité du Roy & de la Royne, & partie sans le sceu de leurs Maiestez. Ils ne font point de difficulté de faire armer le Roy contre ceux de ses subiets desquels il estoit, au parauant leur belle entreprise & arriuee, fidelement & de bonne volonté obey, & sera tousiours iusques au dernier soufpir. Ils font, pour cest effect, entrer sa Maiesté en despenſe mal à propos: ils trouuent bon d'employer les deniers qui y estoient destinez pour aquiter ses debtes (qui sont telles que chacun scait) à exterminer & destruire la plus grande part de sa noblesse & de tous les autres Estats. Qui est comme luy faire couper à soy mesmes les bras & les iambes, & vouloir acheuer de ruiner ce Royaume, qui par leur beau conseil, conduicte & gouuernement est reduict en l'estat que chacun voit. Et finalement ces sages testes de ce Royaume ne se soucient point d'exposer tout cest

Estat en proye, estants apres pour mettre dedans les estrangers, & retirer les compagnies & bons soldats des places les plus importâtes, assauior de Calais & de Mets (sur lesquelles on ne doubte point q̃ nos voisins n'ayent l'œil de bien pres) le tout pour seruir à leurs passions particulieres: ayans en plus grande recommentation de suyure le cours de leur ambitiõ, & paruenir au but de leurs desseins (à quelque pris que ce soit, fust avec la ruyne de ce Royaume) que d'y faillir. Quelle seureté donques voudroit-on que ledict seigneur Prince trouuast avec telles demonstrations & effects de tresmauuaises volontez & intentions?

Quant à ce qu'on remonstre audiect seigneur Prince qu'il doit oublier le particulier pour le public, il luy semble que ceste remonstrance seroit mieux employee à ceux qui ayans premierement & grandement failly, continuent si bien, qu'ils aiment mieux voir perir vne grande partie de ce Royaume, que (pour la conseruation d'iceluy & pour donner seureté à ceux qui ont occasion de la chercher) se departir de la Cour. Cōbien qu'il n'y a bō subiect qui n'aimast mieux s'absenter pour toute sa vie, pour rachepter vn tel incōuenient, que de voir (pour estre present) sa patrie en danger, & son Roy ennuyé. Mais pour colorer leur obstinee volonté de demourer à la Cour, ils alleguent leurs charges & Estats, & qu'estans officiers de la Couronne, on ne les peut ny doibt faire retirer d'aupres de la personne du Roy estat

en minorité. Encores ont ils esté si insolens, qu'ils ont bien osé dire que le Roy, estât mineur, n'auoit pas puissance de les en faire departir. Côme si la Royne ne suppleoit pas au bas aage du Roy, & qu'il fust plus raisonnable qu'à cause de leurs Estats ils demourassent à la Cour, pour desobeir & troubler l'Estat, que d'en departir, pour laisser bon exemple, authoriser le commandement du Roy, & approuuer le gouuernemēt de la Royne. En quoy tout bon & iuste fondement leur défaut, veu mesmement l'occasion & necessité presente. Car il est bien clair qu'ils n'ont pas esté esleuez aux charges pour s'y employer à leur appetit, ny pour troubler le Royaume (en transgressant les Edicts, s'armās non seulement sans commandement ou requisition du Roy ny de la Royne, mais contre leur volonté, & faisant plusieurs violēces) ains pour le maintenir en repos & tranquillité, comme il estoit au parauant leur venue, & deuant qu'ils prissent ainsi les armes d'eux-mesmes, abusans de leurs charges, & entreprenās plus que n'ont de tout tēps fait les propres freres des Roys: lesquels encores qu'ils retournassent d'une bataille, n'ont iamais osé venir à la Cour sinon desarmez. Or pour le moins, puis qu'à cause de leur arriuee & presence à la Cour, ensemble de leurs beaux deportemens, ils voyent auoir fait vn tel remuemēt que d'auoir mis toute la Frāce en trouble & combustion, & esmeu vne guerre ciuile: & qu'au contraire vne pacification & trāquillité depend de leur retraite (d'autāt que ledict seigneur Prince ne voit aucun

autre moyen pour la feureté cōmune ny pour la liberté du Roy & de la Roïne, & que de sa part il a resolu de ne se mettre iamais à leur mercy, comme chacun iugera n'estre raisonnable) il est certain que s'ils sont bons & affectionnez officiers & seruiteurs de ceste Couronne, ils doiuent en ce cas oublier leur particulier: attēdu que ledict seigneur Prince, qui n'en est pas seulement officier & seruiteur, mais a cest honneur d'en estre parent & yssu de la maison & du sang, & qui pour ceste occasion a plus de droit & priuilege qu'eux de demourer aupres de sa Maïesté: outre la consideration de ce qu'il ne s'est pas armé le premier, & que les dessusdicts n'ont aucunement satisfait à la requisition des Estats (comme ils sont tenus premier que d'estre admis au cōseil du Roy) offre toutesfois de se retirer en sa maison & gouuernement, & faire à tous les autres seigneurs & officiers de la couronne qui sont en sa compagnie, faire le semblable. Aquoy si les dessusdicts ne condescendent, ledict seigneur Prince s'asseure qu'il n'y a personne non passionnee qui ne iuge que ce n'est point luy, mais eux seuls qui preferent leur particulier au public.

Que si ces bons officiers de la Courōne ne se contentent de raison, & demandent des exēples, il faudra malgré eux qu'ils confessent ce moyen & expediēt estre raisonnable & accoustumé: puis q̄ c'est la voye qu'on sçait assez, par plusieurs exemples du passé, les predecesseurs Roys auoir suyuie. Lesquels, quand il est aduenu diffé-

rent

rent entre les Princes leurs subiects, iusques à prendre les armes d'eux mesmes, les ont faict poser d'une part & d'autre, & eux retirer en leurs maisons, pour apres les faire venir rendre compte de leurs faicts, & ouyr leurs differens & raisons, quand ils seroyent appelez. Pour le moins, si on a deliberé de souffrir à la Cour (contre toute raison & coustume) ceux qui ne sont qu'officiers de la Couronne, avec les forces qu'ils ont assemblees de leur autorité priuee: on ne scauroit nyer qu'on ne fust vn tort euidant audit seigneur Prince (qui a cest honneur d'appartenir au Roy, & qui n'a pris les armes qu'apres eux, nō à autre fin que pour garder le Roy & la Royne & soymesme, de violence) s'il n'auoit pareil priuilege de estre à la Cour avec ceux de sa compagnie, qui ont aussi bien le sermēt au Roy cōme les autres, & lesquels il asseuera sur son honneur & sur sa vie estre des plus fideles & obeissās subiects & seruiteurs de sa Maiesté: cōme ils ont faict & ferōt bien encores aparoirre. Et lors estans là, ils pourront receuoir les cōmandemens du Roy de Nauarre, lieutenant general du Roy, & luy assister comme les autres, ensemble ayder de tout leur pouuoir à maintenir la liberte & autorité du Roy & de la Royne. Pour le seruice desquels ils sont prests d'employer corps & biens, iusques au dernier denier & dernier soupir. Que si les dessusdicts ne permettent que la Royne vse de ceste equalité trop raisonnable, sans faire cōgnoistre qu'il y ait plus d'affection d'une part que d'autre (encores que s'il y auoit lieu d'incliner, la raison voudroit que ce fust

de la part dudit Seigneur, qui a cest honneur d'estre Prince du sang) & que pour obuier à vne si prochaine desolatiō, ladicte Dame n'interpose, avec si iuste cause, son autorité, autremēt qu'elle n'a encores faict iusques icy: lon ne pourra pas dire qu'elle n'ait eu desir de ce faire, estant si sage & vertueuse cōme elle est, & aimant tellement la grandeur du Roy son fils & la cōseruation de son estat & sa seureté, qu'elle ne voudroit espargner personne en chose de telle importance, & qui menace d'une si grande ruine. Mais on ne doubtera point que ce ne soit la crainte qu'elle a de ceux qui tiennēt leurs forces aupres d'elle, qui l'auront empeschee de faire ce qui est si necessaire: suyuant les preuues assez suffisantes que on a que sa Maiesté est reduicte en tel estat, qu'elle délaisse de faire beaucoup de choses, & en passe d'autres contre sa volonté. Tesmoin l'eslectiō nouuelle de ceux qui ont esté appelez au priué Conseil: lesquels on congnoist bien auoir esté choisis pour seruir de nombre, & pour la tenir en subiection soubs pretexte d'un Conseil. Car on scait assez cōbien autremēt & sans la crainte des dessusdicts, ladicte Dame estoit difficile à amettre des personnes audit Conseil. On scait aussi le peu de respect que luy portent maintenant ceux qui font tous les iours (des cōseils a part, puis luy font passer ce qu'ils ont arresté: font des depesches, puis les luy communiquēt, & font dauātage faire & passer à vne Cour de Parlemēt ce qui leur semble bon & qu'ils ont entrepris, & monstrēt bien y auoir plus de credit & autorité que le Roy

& la Roynne n'y en ont peu auoir. Bref qui est celuy qui ne confessera estre à present plus que necessaire que la-dicte Dame reprenne son autorité accoustumee, sans estre plus enuironnee de gens de guerre, & que les dessusdicts se retirent avec leurs forces, pour leuer la crainte & sousspeçon qu'ils ont non sans occasion donné à tant de gens, & pour obuier aux calamitez dont cest estat est menacé: & mesmemēt par ce que ledict seigneur Prince & tous ceux de sa compagnie (qui sont des meilleurs seruiteurs de ceste Couronne) & autres de tous estats sont resolu vne fois pour toutes d'esprouer toute fortune, & employer leurs vies iusques à la derniere goutte de leur sang, plustost que de voir la force en ce Royaume entre les mains de ceux à qui il n'appartient, qui en ont abusé par le passé avec si grāde ruine des subiects du Roy: & de nouueau ont faict tels carnages & violences contre ceux de la Religion que tient ledict seigneur Prince, sans auoir esgard aux Edicts du Roy, que pour le moins il se gardera bien, tant qu'il viura & pourra, de se mettre en leur puissance & mercy: dont il s'est par cy deuant trop mal trouué.

ET POVR ne laisser lieu aux calomnies & plaintes que les dessusdicts font faire contre ledict seigneur Prince, & mesmes à ce qu'ils mettent en auant que luy & ceux de sa compagnie arrestent & ouurent les paquets du Roy: il desire bien qu'on entende qu'il a tousiours porté telle reuerence à ce qui appartient à sa Ma-

iesté, & portera toute sa vie, qu'il a dès le commencement tresexpressément defendu de ne toucher aux pacquets du Roy, de la Royne ny du Roy de Nauarre. Il est bien vray que ce respect n'a esté gardé (côme il n'est pas raisonnable) aux lettres de plusieurs particuliers, qui ont esté arrestees & ouuertes: par lesquelles on a veu vne infinité de maledicences, calomnies, faux bruits, pratiques, desseins & entreprises incroyables, contraires aux propos de seureté qu'on fait tous les iours tenir audict seigneur Prince: qui ne se repent point de ce qu'il en a fait, & ne voudroit pour ceste occasion en auoir vsé autrement, ayant par là cogneu plus auant leurs mauuaises volonte.

Des brisemens d'Images faits à Tours & à Bloys, le dict seigneur Prince & ceux de sa compagnie en ont receu vn tresgrand desplaisir: de sorte qu'il a mādé aux officiers du Roy ausdictes villes qu'il leur ayderoit & tiendroit la main forte pour faire chastier exemplairement ceux qui ont commis telz actes. La façon dont il s'est cōporté en ceste ville d'Orleans en rend bon & suffisant tesmoignage, les louanges que luy en dōnent les Ecclesiastiques, les remerciemens publiques qu'ils luy ont faits, & ceux des autres Estats, pour le reiglement, douceur & moderation de vie, dont luy & tous ceux de sa compagnie vsent, sans blasphemie & sans faire rigueur, ny vn seul tort ou violence à aucun, ny trangresser l'Edict de Ianuier dernier: encores puis n'agueres s'estant

trouué quelque Image brisée il a fait mettre ceux qui s'en trouuent chargez entre les mains de la iustice, pour les punir au premier iour.

Et pour le regard de ce qu'on se plaint des villes lesquelles les habitans mesmes gardent, & dont ils se sont saisis & asseurez: ce n'a esté en autre intention que pour faire seruice au Roy & à la Royne, & pour empescher que ceux qui abusent du nom & autorité de leurs Maiestez, & qui les tiennent enuironnez de leurs armes, s'en puissent ayder & les faire seruir à leurs passions particulieres. Car aussi tost que ladicte Dame sera en sa premiere liberté, ainsi qu'elle estoit il y a deux mois, elle cognoistra que lesdictes villes sont en pareille obeissance & subiection qu'elles ont tousiours esté, & veulent demeurer à iamais, & ne voudroyent ceder à quelzconques autres villes de ce Royaume de fidelité vers leursdictes Maiestez, & moins à celles qu'on sçait auoir de long temps comploté de cōmencer & entretenir sous pretexte de Religion ceste guerre ciuile, iusques à promettre & fournir à des particuliers argent pour cest effect.

Au demeurant, tant s'en faut que ledict seigneur Prince & ceux de sa compagnie puissent mettre sous le pied ce qui s'est passé en ce faict, & n'en parler iamais (comme on luy a remōstré qu'il falloit qu'il fist) que plustost ils veulent s'en ressouuenir à iamais, peindre en tableaux, escrire en lettres d'or, faire publier & sonner

hautement par toute la Chrestienté le bon deuoir de fidelité qu'ils ont rendu si à propos à leur Roy, exposé en cest aage à iniure & violence: pour seruir d'exemple & perpetuel tesmoignage de la façon d'ot ledict seigneur Prince & la noblesse de France se sont si promptement, en si bon nombre & si vnanimement assemblez, pour la seureté & liberté de leur Prince, & pour la conseruation de sa personne & de son estat. Et ne pense point ledict seigneur Prince que cy apres il se puisse iamais presenter deuant luy vne plus belle ny plus memorable occasion de luy faire seruice, ny en plus beau & digne moyen d'acquerir vn vray honneur & louange: pour le moins, qu'il espere d'auoir la grace de Dieu & celle de son Prince pour ce faict, quand il sera paruenue en aage d'en faire iugement, & de cognoistre & estimer cest acte de vraye & fidele affection que ses subiects luy ont rendu en telle saison.

C E S choses considerees, ledict seigneur Prince, s'estant mis en tout deuoir de pacifier ce trouble, qui ne semble tendre qu'à vne manifeste ruine & subuersion d'estat, & s'estant soubmis à toutes les conditions raisonnables qu'il a peu, de poser les armes d'une part & d'autre (sans auoir esgard sinon à la liberté du Roy & de la Royne, & à la seureté commune, laquelle il a occasion de chercher) proteste de rechef deuant le Roy & la Royne, & toutes les cours de Parlemens, & tous les estats de ce Royaume, que des maux, calamitez & deso-

lations qui pourront cy apres suruenir, la faute en doit estre imputee à ceux qui en sont auteurs & la seule cause, & qui ont resolu de plustost troubler tout cest estat, en demeurant à la Cour & au conseil du Roy (où mesmes ils ne peuuent ny doiuent à present demeurer, n'y estre admis, suyuant la requisition des estats, & iusques à ce qu'ils y ayent satisfait) que s'en departant y laisser vn commun repos & tranquillité.

Requier toutes lesdictes Cours des Parlemens, villes & communautez de cedit Royaume de soigneusement peser les choses susdictes, & de faire tous les bons offices qu'ils doiuent, & qui leur sera possible, pour le seruice du Roy & seureté de sa personne & de son estat, & pour maintenir l'autorité & gouuernement de la Royne : à ce que cy apres ils puissent rendre si bon compte & suffisant tesmoignage de leurs actions en ceste presente necessité (comme ledict seigneur Prince entéd faire des siénes) au Roy estant paruenu en aage de commander soymesmes, que sa Maiesté ait plustost occasion de les en louer, estimer & remercier, que de les blâmer de peu de deuoir, ou d'auoir plus suiuy leurs passions, craint ou gratifié quelques particuliers (qui veulent à present colorer, authoriser & faire ratifier leurs fautes) que regardé à la conseruation de son estat.

Prie ledict seigneur Prince affectueusement tous les bons & loyaux subiects de ceste courône de luy prester

aide faueur & assistance en vne cause si iuste & saincte: appellant Dieu à tesmoin, que seulement le desplaisir de voir le Roy & la Royne, traictez par les dessusdicts leurs subiects si indignement, & enuironnez de leurs armes & forces (tout autrement qu'il n'auoit iamais esté veu en ce Royaume) & le desir de maintenir l'honneur de Dieu & le gouuernement de ladicte dame, ensemble de conseruer à son pouuoir cest estat, & la plus grand part des bons subiects du Roy, l'a contrainct de s'opposer à leur violence. Ce qui a pour le moins tellement profité iusques icy, qu'ils n'ont encores osé exercer leurs entreprises assez descouuertes: qui eussent certainement reduict ladicte maiesté en telle extremité & seruitude que Royne ait de long temps esté veüe, & la plus part desdicts subiects du Roy en trespiteux estat & grande oppression. Il louë Dieu grandemēt de ce qu'il a pleu à son infinie bōté & prouidēce, luy mettre en main le moyen de leur resister iusques à present. Lequel il espere & s'as-seure qu'il luy fera la grace de mener à vne bonne & heureuse fin pour son seruice, & pour celuy de leursdictes Maiestez. Donnē à Orlēans le vingtcinquiesme iour d'Auril, l'an de nostre Seigneur. Mil cinq cens soixante deux. Ainsi signé.

LOYS DE BOURBON.





